

Newspaper	BERITA HARIAN
Date	8 JULY 2016

Keselamatan seluruh negara dipertingkatkan

➔ Kefahaman Islam tulen perlu diperhebat bendung keganasan: PM

Oleh Magendran Rajagopal,
Lum Chee Hong
dan Ahmad Suhael Adnan
bhnews@bh.com.my

✦ Putrajaya

Kerajaan akan terus meningkatkan keselamatan di seluruh negara dan mengambil tindakan penguatkuasaan dalam usaha membendung kegiatan penganas, kata Datuk Seri Najib Razak.

Perdana Menteri berkata, kerajaan juga perlu meningkatkan kefahaman rakyat berkaitan Islam tulen.

“Apa yang berlaku di Madinah (Isnin lalu) adalah perbuatan yang mencemarkan imej Islam sebab jelas sekali ada segelintir kecil di negara terbabit beragama Islam tetapi tidak faham apa Islam sebenarnya dan membunuh mereka yang tidak berdosa.

“Ia adalah satu kesalahan cukup

besar di sisi Islam,” katanya ditemui pada Majlis Rumah Terbuka Aidilfitri Perdana Menteri dan anggota Kabinet di Kompleks Seri Perdana, kelmarin.

Beliau mengulas tiga serangan pembom bunuh diri yang menggempakan Arab Saudi, termasuk di tempat kedua paling suci untuk umat Islam iaitu di Masjid Nabawi, Madinah yang menyaksikan empat pengawal keselamatan terbunuh, Isnin lalu.

Salur maklumat

Perdana Menteri juga meminta rakyat Malaysia bekerjasama dengan pasukan keselamatan dalam memerangi kumpulan penganas di negara ini, termasuk menyalurkan maklumat jika ada sesuatu atau seseorang yang mencurigakan.

“Kita berada dalam era globalisasi. Apabila kita berada dalam dunia yang tiada sempadan, maka apa yang berlaku di luar negara

kita, akan ada tempas dan melular di negara kita.

“Sebagai asas, kita harus menolak fahaman ekstremisme, militan. Gunakan kesederhanaan, wasatiyyah sebagai landasan,” katanya.

Sementara itu, Timbalan Perdana Menteri, Datuk Seri Dr Ahmad Zahid Hamidi, berkata kerajaan akan gunakan khidmat bekas tahanan yang terbabit dalam kumpulan militan untuk membanteras pengaruh anasir itu dalam kalangan masyarakat.

Katanya, itu antara langkah yang diambil Kementerian Dalam Negeri (KDN) dan Polis Diraja Malaysia (PDRM) bagi mengelak rakyat Malaysia terpengaruh dengan ideologi keganasan.

“Bekas tahanan yang sudah melalui proses deradikalisasi akan digunakan untuk memberi kesedaran kepada rakyat supaya tidak terpengaruh dengan ideologi IS,” katanya.

BH - 8/7/2016